

四庫全書

集部

欽定四庫全書

御訂全金詩增補中州集卷五十四

河汾諸老

補

補元房祺河汾諸老詩集序近代詩人遺山元  
先生為之冠先生太原人太原境與平陽接河  
山勝槩地土所宜習俗所尚古今人物不殊至  
如師友淵源文章正脈略與之等故河汾間諸  
老與天下人材無讓麻貽溪與元老詩學無歉

古文出其右公言也張石泉房白雲與元老游  
從南者子颺子京二陳昆仲與元老或詩或文  
數相贈遺者遜菴菊軒有稷亭二段之目與元  
老相次登第者曹兌齋與元老同為省掾日以  
文詩講議者或曰兌齋雲中應人也吾子列河  
汾之間得無附會與不然兌齋之先誠應人自  
客汴梁北渡居平陽者三十餘年發明道學為  
文楷式指授後進桃李光輝盈溢其門或教授

鄉里或宦達四方有二子叔舉季行大筆亦盛  
傳而況狀元王公趙城人曹之外父也兌齋生  
而隱德光輝汾晉沒而丘壠在焉豈非吾鄉先  
生歟夫諸老之詩有深而冲澹如陶柳者有豪  
放如李翰林劉賓客者有輕俗近雅如元白者  
有對屬切當如許渾者有騷雅奧義古風大章  
浸入於杜草堂之域者往年吾友楊君仲德議  
成此集不幸早世仲德有云不觀遺山之詩無

以知河汾之學不觀河汾之詩無以知遺山之  
大不觀遺山河汾之作不知唐人諸作者之妙  
不觀唐人之作不知三百篇六義之深意予今  
纂錄自貽溪至兌齋凡八人得古律詩二百一  
首號曰河汾諸老詩集已有郝先生序文於前  
甚備不肖繼言於後才識淺陋不能盡其蘊雖  
然吾鄉學者如林有能慕河汾之派觀是集者  
知所興起云大德辛丑歲二月望日橫汾隱者

房祺序

附高昂霄刻河汾諸老集啓河汾諸老詩集者  
迺大同路儒學教授房先生之所編也予一日  
得之惜乎諸老一代高名百年清氣已嘗遍白  
於天下是集未嘗流布也皇慶癸丑夏特命工  
鋟本以廣其傳然而諸老之學又豈專乎詩也  
出處大略已具前序今書是說以告夫後之學  
者不為無益云六月吉日尊賢堂高昂霄具白

貽溪麻革 三十六首

補

補麻革字信之臨晉人秉彝孫隱居不仕教授  
王官谷號貽溪先生有文集行世

上雲中帥賈君

北極長虹掣西垣太白高千年知運圯四海共兵塵霧  
黑龍蛇鬪山昏虎豹嘯石傷填海羽波動負山鼇遺介  
潛寒渚驚鼃走夜牢江山留慘黯天地入煮蒿衆折思  
枝柱初寒俟蠶繰明良逢慶會鄉曲得名豪梁棟因人

出餘臙為世操安流欣鼓枻奔浪獨能篙日出戈揮景  
江翻弩射濤風聲連頌洞裁鑒悉纖毫桃李勤封植茅  
菅日雉薈獵場游麋鹿魚渚動鱖魚井邑生春色禾麻  
飫土膏民歌烏遶屋士喜馬騰槽朔塞間刁斗天山擁  
節旄岱嵩何落落江漢自滔滔大寶珠仍壁長城雉與  
壕崇牙分檠戟大纛屬韃橐日月依龍德風雲挾豹韜  
夾山羣戰騎黑水泳輕舠落日觀魚浦秋風射雉臯化  
行家置塾役簡里停鑿歌奏投壺室文間治獄曹西菴



談性理東閣會奇髦森爽開璜璫縱橫列鴈羔禮容新  
泮宇物性遂莊濠牧唱聞朝起樵音聽暮號孤嬰收坎  
阱流滯起蓬蒿屢下陳蕃榻誰空北海醪邵軍敦禮樂  
曹館富風騷客望龍門聚雛從鳳穴翔世知三窟隘人  
可二天逃雨露承恩命山河襲世勞功名高衛霍輔弼  
慕伊咎鞍馬憐髀肉簪纓視鬢毛雅申張仲德頌入魯  
侯昭有客傷淪落無堦寫鬱陶太行雲暮暮代北雨騷  
騷去國心將折懷人首獨搔身如伏櫪驥情似失林猱

涸轍將安往窮途況所遭幸今逢匠石直欲啖醢糟  
已誠無有登門亦已叨沐薰良備至感激欲號咷已容  
馮驩舍猶傷范叔袍鍰須開匣劍割欲試鉛刀杞梓容  
山木包羞薦沼茅每思休困頓佳蔭有蘭皋

送杜仲梁東游

仲梁先稱善夫

野馬何決驟飛雲何悠颺商巖不足稽此士又欲東略  
宋與梁青山不知老白日乃許忙菊潭之水清冷淵野  
人飲之得長年芳醲不買壽淡泊差可久北山峩峩蒼

翠巔丹崖石老生紫烟靈芝秋杞老霜骨黃精茯苓飽  
新斲望君嶄嶄病以臞酌之食之可以還膚腴況有劉  
荊州元丹丘子寧舍之汗漫遊涼秋佳月酒一杯送子  
東下心徘徊半山亭前一茅屋歲寒松勁君當來

短歌行送秦人薛微之赴中書

河流宿層冰山有太古雪翩翩有客來老面黑於鐵盤  
盤胷臆間猶挂太華月不肯下貴勢便欲叫雙闕朔寒  
衣裳單路馬遠蹶蹶昔人丈夫事肝膽不可越我歌送

君行歌聲何激烈悲風為我起酒行歌半闕望君青雲  
端何恤遠離別

關中行送李顯卿

關中行我持一杯酒送君西入秦秦川鬱相望渭水流  
沄沄黃河中折倏復來太華倚天青壁開我送君兮渺  
何許春風不肯吹君迴舉酒酌五陵浩歌登高臺終南  
之山何崔嵬長安舊遊安在哉百年繁華成劫灰千古  
英雄沉草萊風塵瀕洞豺狼暮天地茫茫入烟霧我載

歌送君去太華終南宜有深絕處巖扃人跡所不到石  
壁蒼苔老烟雨山堂挂女蘿充腹多薯蕷玉井蓮開十  
丈花茯苓根結千年樹白雪青松良可老鹿門有龐商  
有皓不然凌雲學輕舉呼取安期羨門語憶昨與君友  
相逢日日酬杯酒酒闌起舞肝膽開小桃唱罷歌楊柳  
晉語狎秦臞秦談驚晉叟秦晉之交那可無胡為不作  
雙飛鳬碧草離離生早春哀歌望斷西南雲求君於終  
南之上不可得太華峯頭會見君

阻雪華下

愛山久成癖得山真雋永太華隔風塵五年夢幽境傳  
聞十丈蓮擬扣玉仙井雪花忽迷漫蒼巔墮昏暝蹇予  
世緣深方外久自屏意是希夷君俗駕踈造請行行風  
撼林稍稍雲度嶺雲間三峯面隱約露芒穎初如灩澦  
堆屹起勢奔猛漸如倚天劍萬仞鐵花冷烟霞半明滅  
瞬息變光景乃知造物心相哀亦相警歸鞭晚忽忽回  
首心耿耿浩歌夜深寒孤月挂峯頂

置酒半山亭

得秋字

懷抱久不寫兀坐如繫囚永懷西山勝浩蕩成茲遊巖  
壑互窮窈叢蘿鬱深幽飛烟入虛無長風跨崑丘楚甸  
散林莽商顏亦綢繆雷雨天地空景氣入夜浮況當節  
律變萬物颯以秋雲來白日慘天澹清江流西望渺關  
河沉沉生暮愁蘭苕暗幽谷菱荷老芳洲一笑舉酒觴  
浩歌聊自酬幽賞興未極慨嘆心悠悠世事蒼茫外寒  
沙明白鷗

歸潛堂為劉京叔賦

逃淵魚深處避弋鴻冥飛古來賢達士亦復歌采薇南山先廬在兵塵悵睽違山空無人居惟見草木肥翩然千歲鶴一朝復來歸新築臨渾水行逕窮以微清流鳴前除白雲入晨扉迴顧陵谷遷萬事倏已非著書入理奧得句窮天機前路正自迫此道倘可幾殷勤握中璧龜兔留餘輝第恐遯世志還負習隱譏永懷泉上石一觴與君揮惜無凌風翰遐舉非所希



守約齋為呂仲和作

讀書不務博造道當入微一理貫萬理一岐會衆岐譬  
彼庖丁刀騞然解牛時節間既有得肯綮寧復疑道喪  
向千載聖遠孰可期養勇敢所愜養氣動以隨心非安  
如山遇變鮮不移吾門有聖學觀心乃其師宴坐一室  
中自得適在茲胡為滯紛感紉繹如蠶絲人生矧多欲  
事物日以滋牛羊踐徑蹊虎豹攻藩籬我嘗叩天理誠  
明不容欺第恐達者事還為狷者嗤

楊將軍垆馬圖

古人相馬不相肉畫工畫馬亦畫骨淡淡生絹一片雲  
眼中羣龍何突兀飛菟汗血天驥種筆墨之間見飛動  
前趨後逐互有態涉嚙行留分向背豐草長林性本真  
駟駟駢駢相與馴開元天子盛監牧四十萬匹錦繡屯  
人言駿馬戰所重風鬣霜蹄惜無用君不見幽燕飛輕  
時中原流血成淵池祇今征討苦未休金鞍鐵馬彌山  
丘安得放歸如此馬飲水求芻恣閒暇

題李氏寓酒軒

吾聞李謫仙一斗詩百篇酒家眠又聞陽諫議月廩盡  
以送酒錢伯倫酒德頌無功醉鄉仙說到飲中理茲世  
何渺然古來賢達士以酒全其天所以陶靖節浩歌歸  
田園獨予醉翁之意不在酒樂在山水靜所便古人已  
矣不可作今人紛紛亦能賢北里富熏天高樓歌舞筵  
千金結客多少年衰吹豪竹倒傾玉船以酒互為市地  
勢相蟬嫣焉知貧士貧到骨健倒仰天歌黃鵠黃鵠歌

罷無翼飛妻啼兒號書一束借問主人翁心跡誰與同  
我亦頗解飲聖賢時一中酒酣擊樽破兩耳生春風安  
得園綺遇攜我入山去清泉為釀碧溪深醉卧溪頭弄  
雲雨

廬山兵後得房希白書知弟謙消息

聞道王師阻渭津廬山以後陷風塵軍行萬里速如鬼  
風慘一川愁殺人亂後僅知家弟在書來疑與故人親  
夢中亦覺長安遠回首關河淚滿巾

晚步張輦田間

地入荒蕪過客稀  
邨深門巷暮山圍  
悠悠獨鳥穿雲下  
策策寒烏掠日飛  
人事百年梧葉老  
秋風萬里稻花肥  
兵塵河朔迷歸路  
惆悵平沙送夕暉

板橋道中

篁竹蕭蕭野水濱  
光風過眼與時新  
陰崖積雪猶含凍  
遠樹浮烟已帶春  
世故未應悲古道  
歲華聊得伴閒身  
巖芽筍稚行當好  
準擬山中問主人

過陝

萬古茅津據上遊，峽函西去接秦頭。  
悲風鼓角重城暮，落日關河百戰秋。  
形勝古來須上策，塵埃歲晚只羈愁。  
豺狼滿地荆榛合，目斷中條是故丘。

為王德新壽

百年人物惜凋零，尚喜衣冠見老成。  
數口藿鹽憂桂玉，一川風雨獨柴荆。  
紅顏未羨方春好，黃髮應從此夜生。  
異日華林講殊禮，不妨鳩杖從公行。

為秦人梁帥壽

功名萬里駕龍荒不作當年陞楯郎  
顏角久瞻天上日鬢毛未點鏡中霜  
衣沾暑雨千秋潤扇引薰風六月涼  
見說長年出冲靜海山求藥本微茫

送申生取新赴中書

寒山漠漠日初曛過盡蕭蕭鴈鴛羣  
百代高歌餘白雪一朝飛步上青雲  
倚門骭髀誰憐我滿腹精神獨見君  
看取扶搖便鵬翼臨岐且莫嘆離分

寄杜仲梁

塞上愁多雲易陰故人雖在鴈無音  
交情念子黃金重世故稽人白髮深  
芳草春風千里夢青燈夜雨兩鄉心  
岱宗入眼東南秀悵望雲山淚滿襟

寄元裕之

朔雲陰雪晚重重日入寒蕪塞草空  
沂水東回無去翼天山南斷有哀鴻  
三年遠別交情外一夜相思客夢中  
明日關河對雙淚祇將幽憤寄秋風



竹林院全張之純賦二首

柳色侵尋映短籬  
竹梢零亂挂殘暉  
山禽自識忘機客  
飛下庭柯更不飛

稍稍林間布穀聲  
邨南邨北水雲平  
偶來竹寺看山坐  
閒聽清溪遶舍鳴

中書大丞相耶律公挽詞

甲辰五月十四日

砥柱中流折歲舟  
半夜移世賢高允  
相人嘆叔孫儀未  
識荊州面嘗蒙國  
士知無階陪引紼  
萬里望靈輶

文獻羣公表東丹八葉傳珪璋貽嗣德蘭藻霑遺編禁  
籍虛青瑣神遊定玉泉太常千字誅誰有筆如椽

密國公挽詞

鬱鬱佳城閉翩翩銘旌開風悲信陵墓雨入孝王臺萬  
古傷梁壞千年望鶴來平明國門外簫鼓不勝哀  
漢制隆恩禮周封列屏翰人知尊帝胄我但識儒冠零  
落傷蘭桂孤高歎鳳鸞從今門下客長缺向誰彈

王子壽鄉友生朝

自接夫君席頻逢歲律更面嚴知氣直語出見生平講  
學詩書義論交里社情鬚髯如戟在長對玉峯明

送李端卿之鄴臺

僮馬戒晨裝新霜木葉黃嗟予無壯節送子慘離腸林  
麓荒秋色清漳下夕陽遙知一樽酒弔古鄴城傍

為喬子春壽

講道顏淵巷新齊友與同守身為大節寡欲是全功教  
子勤書裏娛親養疾中黃花佳節近歲歲看秋風

贈劉伯威

劉子山中秀相逢氣自同  
箕裘門戶計菽水古人風  
折節豈為辱苦心應有終  
平生湖海志未用哭途窮

贈王明伯

遼海遺珠在黃華秀未空  
百年書法裊萬事酒盃中  
耿耿此心在悠悠吾道窮  
好賢明達事獨喜與君同

秋夜感懷

老境歡娛少愁懷感嘆長  
世途多險阻歸興渺蒼茫  
踈

雨梧桐夜西風蟋蟀牀平明攬青鏡衰鬢又添霜

趙太監降日

自從龍戰野特立孰如公著跡雲鵬上收功汗馬中高  
談天下計餘事古人風勿藥行逢喜春風兩頰紅

雲中夜雨

憔悴杜陵客悲涼王仲宣四圍晴立壁一突午無烟病  
卧秋風裏愁吟夜雨邊明朝誰裹飯萬一使君憐

渡洛

泉石經行久林立彌望間溪鳴風蕩水谷暗雨含山淡  
淡輕鷗沒飛飛倦鳥還世緣良自苦空羨野雲間

浩浩

浩浩春風裏悠悠倦客情天寒花寂寞冰泮水縱橫念  
遠心將折聞兵夢亦驚江山憔悴久倚杖歎餘生

附麻革游龍山記余生中條王官五老之下長  
侍先人迺觀太華迺遷東遊洛因避地家焉如  
女几烏權白馬諸峯固已厭登飽經窮極幽深

矣革代以來自鴈門踰代嶺之北風壤陡異多  
山而阻色往往如死灰凡草木亦多悴容嘗竊  
慨歎南北之分何限此一嶺地脈遽斷絕不相  
屬如是耶越既留滯居延吾友渾源劉京叔嘗  
以詩來盛稱其鄉泉石林麓之勝渾源實居代  
北余始而疑之雖然吾友著書立言斬信於天  
下後世者必非誇言之也獨恨未嘗一遊焉今  
年夏因赴試武川歸道渾水修謁於玉峯先生

魏公公野服蕭然見余於前軒語未周決驟曰  
是邦諸山若南山若柏山業已遊矣惟龍山為  
絕勝姑闕茲以須諸文士同之子幸來殊可喜  
乃選日為具拉諸賓友騎自治城西南行十餘  
里抵山下山無麓乍入谷未有奇沿溪曲折行  
數里草木漸秀潤山聳出嶄然露芒角水聲鏘  
然鳴兩峯間心始異之又盤山行十許里四山  
忽合若拱而揖環而衛者嘉木奇卉被之蔥蒨



醲郁風自木杪起紛披震蕩山與木若相顧而  
墜者使人神駭目眩又行數里得泉之泓澄渟  
溜者焉洑出石罅激而為迅流者焉陰木蔭其  
顛幽草繚其趾賓欲休咸曰莫此地為宜即下  
馬披草踞石列坐諸生淪觴以進酒數行客有  
指其大石曰此可識因命余余乃援筆書凡遊  
者名氏及遊之歲月而去又行十許里大抵一  
峯一盤一溪一曲山勢益奇峭樹林益多杉檜

枯柏而無他凡木也奇花種種金間玉錯芬香  
入鼻幽遠可愛木蘿松鬣冒人衣袖又紫紆行  
數十里得岡之高遽陟而上馬力始不能勝行  
茂林下又五里兩嶺若岐中得浮屠氏之居曰  
大雲寺有僧數輩來迎延入館於寺之東軒林  
密樹石榴比楸立皆在几席之下憩過午謁主  
僧英公相與步西嶺過文殊巖巖前長杉數本  
挺立有磴懸焉下瞰無底之深危峯怪石噴岌

巧闢試一臨之毛骨森然南望五臺諸峯若相  
聯絡無間斷西北遙望峯豁而川明村墟井邑  
隱約微茫如奕局然徜徉者久之資緣入西方  
丈觀故侯同知運司雷君詩石及京叔諸人留  
題迴乃徑北嶺登萱草坡蓋龍山絕頂也嶺勢  
峻絕無路可躋步草而往深翳且滑甚攀條捫  
蘿疲極乃得登四望羣木皆翠杉蒼檜凌雲千  
尺與山無窮此龍山勝概之大全也降乃復坐

文殊巖下置酒小酌日既入輕烟浮雲與暝色  
會少焉月出寒陰微明散布石上松聲翛然自  
萬壑來客皆悚視寂聽覺境愈清思愈遠已而  
相與言曰世其有樂乎此者歟酒醺談辯蠶起  
各主其家山為勝如郭主太華劉主茲山余主  
王官五老更嘲迭難不少屈玉峯上坐亦怡然  
一笑詩所謂善戲謔兮不為虐兮者正如是也  
至二鼓乃歸卧東軒明旦復來各有詩識於石

迨午飯主僧丈室已乃循嶺而東徑甚微木甚  
茂密僅可通馬又行五里至玉泉寺山勢漸頗  
隘樹林漸稀濶顧非龍山比寺西峯曰望景臺  
甚險主僧導客以登歷嶽峯坐盤石其旁諸峯  
羅列或偃或立或將仆墜或屬而合或離而分  
賈奇獻異不一狀北望川口最寬肆金城原野  
分畫條列歷壁可數桑乾一水紆繞如玦觀覽  
曠達此玉泉勝處也從此歸路嶮不可騎皆步

而下重谿峻嶺愈出愈有抵暮乃得平地宿李  
氏山家卧念茲遊之富與夫昔所經見而不能  
寐若太華之雄尊五老之巧秀女几之蜿蜒烏  
權白馬之端重茲山固無之至於奧密淵邃樹  
林薈蔚繁阜不一覽而得則茲山亦豈可少哉  
人之情大抵得於此而遺於彼用於所見而不  
用於所未見此通患也今中書令湛然公紀西  
域事稱金山之秀李子微貽友書論和林之盛

有過於中州者不知天壤之間六合之內復有  
幾龍山也因觀山於是乎有得徒以文思淺狹  
且遊之亟無以盡發山水之秘異時當同二三  
友幅巾藜杖施施而行遇佳處輒留更以筆札  
自隨隨得隨紀庶幾山之鬚髯云

石泉張宇

二十首

補

補張宇字彥升自號石泉先生

送趙宜之歸辛安兼簡浴下諸友

悽惻復悽惻送君汾水側人生歡會少一別難再得昔  
經劫火然二鳥奮驚翼嗷嗷各何之全落天西北日夕  
相和鳴此樂未易極狂風忽吹散一鳥歸故國翱翔入  
寥廓萬里期一息鄧林有餘蔭未肯棲枳棘玉山有嘉  
禾未肯求粒食一鳥獨未歸毳毼老無力矯首思舊羣  
潸然淚沾臆

雌雞行

雌雞粥粥將鳬兒鳬兒入水雞鳴悲岸南岸北飛且隨



但恐搏攫遭鳶鷂岸傍無食寧饑死朝暮不肯須臾離  
傍人爭笑愚且癡我哀物理為人欺

雲溪秋泛圖為閩國寶賦

晴嵐滴翠霜樹殷石錦錯落苔花斑人家隱約荒靄外  
但見籬落連柴關兩山中斷忽空曠下有碧水之潺湲  
幽人航葦迷遠近思致偃蹇無容攀定非鷗夷成霸業  
一舸五湖烟浪寬又非坡仙遊赤壁酒酣浩歌江月寒  
亦當拄杖橫膝看南山心與白雲相對閒胡為厭山瞰

芳渚岸草汀花適幽趣有聲之畫無聲詩夏蟲未易寒  
冰語或云此本張季鷹尊鱸忽憶扁舟輕蹇予有家歸  
未得一見秋風羽翼生

採蓮

分得底字

溪風搖搖波瀾瀾十里芳華照清沚蘭舟女郎紅玉春  
日射新妝明水底芙蓉雙臉百媚生吳宮西施漢良娣  
藕腸折斷雪絲牽入手花枝香茫茫隔岸誰家貴公子  
調笑新詞歌艷體吳儂變風有如此誰念采蘋供祭禮

哭姪

學業方成二紀過，虛舟一夕殞。  
顛波死皆有，命憐渠早。  
老獨無依，奈我何歸計？雲山空莽蒼，愁懷日月暗消磨。  
白楊半夜風蕭瑟，盡是吾兒薤露歌。

感懷

世路羊腸劇險艱，天心應厭著儒冠。  
老無子息休心易，貧有交親託事難。  
文字售人真滯貨，廉平養己似閒官。  
義經讀罷無人會，庭竹蕭森夜月寒。

弔蕭同知

蕭蘭一夕隕秋霜數載交情遽忍忘遊覽雲山春並轡  
笑談風雨夜連牀治心我謂當誠慤處已君言貴肅莊  
此理從今誰與論隰州松月渺蒼蒼

上巳日遊平湖

微風漠漠水增波禊事重修繼永和脆管當筵清似語  
扁舟爭岸疾如梭一時人物成高會千里雲山入浩歌  
日暮芝蘭無處覓野花汀草占春多

送田茂卿赴都

宿雨初晴草木齊一杯汾水恨分攜上林曉色多鶯友  
長路春風入馬蹄黃卷可能無斗祿青雲自是有天梯  
從來俊傑知時務莫為寒窓故紙迷

和李子微村居二首

健羨南溪老幽居水石間心無塵事汨身與白雲閒院  
靜深藏竹塙低易得山蒲團香一炷花落鳥關關

別墅荒城外居閒事事幽栽松添野色接畝引溪流詩

社新韻村醪洗舊愁更求名與利騎鶴望揚州

送李仲暉之洛

同是思鄉客君先著祖鞭驪駒歌落日去鴈入高天莫  
戀河濱粟當耕谷口田新朋倘相問為報已衰年

送馬德新

馬弟吾鄉秀青雲正壯年四知雖自畏六戒得師傳秦  
府開賢路瀛洲列俊躔秋風黃鵠健老眼看高騫

贈黃德甫璋

明德本生公醫名一代雄杖頭閒日月舌上舊家風雅  
趣錢神外高情酒聖中活人陰德在壽骨秀而豐

和劉敏之韻

城居寧不好未易著閒人客至慙無酒詩成莫療貧譚  
天雖有口無地可安身羨殺清江鷺生來不受塵

秋日出郭

離離禾黍滿郊墟棗實紅殷接野間四十年來無史筆  
有年今日仗誰書

和李濟夫韻

午夢遊仙鳥喚迴竹陰掃地淨無埃莫言嘉客閒中少  
時有清風自往來

荆公

作古非今禍已成亦知鬼責與天刑試看一病遺言處  
猶勸傍人誦佛經

襄陵北城溪坐

楊柳陰陰水氣涼椒花蔌蔌野風香地偏愈覺似閒整



始信明昌化日長

閒述二首

此性生而與道俱靈源常患少人疏楊侯一語崇經學  
士子爭相讀四書

解作時文一二篇胸中意氣已掀然何如剖破醯雞瓮  
看取人間大有天

御訂全金詩增補中州集卷五十四

# 欽定四庫全書

集部

御訂全金詩增補中州集卷五十五

六

詳校官中書

臣張虎拜

主事銜

臣徐以坤覆勘

總校官編修

臣

王燕緒

校對官編修

臣

勵守謙

謄錄監生

臣

黃嘉績

欽定四庫全書

御訂全金詩增補中州集卷五十五

兌齋曹之謙

四十五首

補

補曹之謙字益甫雲中應人幼知力學早擢巍  
科與元遺山同掾東曹機務倥傯商訂文字未  
嘗少輟北渡後居平陽者三十年與諸生講學  
一以伊洛為宗衆翕然從之所著古文雜詩三  
百首曰兌齋文集汲郡王惲序之曰先生之作

析理知言擇之精語之詳渾涵經旨刊落陳言  
當其自得又抑揚有法豐約得所可謂常而知  
變粹而不雜者也

附歸潛志曹恒君章應州人高丞相汝礪之壻  
也少讀書不肯為科舉計惟孤介不肯事富貴  
人南渡居大梁葺軒種竹號友直余先子為作  
詩賦之又好收古人書畫器物藹然有士君子  
風遭亂病歿有子之謙擢第

送梁仲文

聖人既已沒聖道遂不傳異端壅正途榛塞踰千年大  
儒起相承聞之斯廓然濂溪廻北流伊洛開洪源學者  
有適從披雲見青天我生雖多難聞道早有緣中歲苦  
病目不得深窮研梁君河東秀意氣凌孤騫探道得奧  
閫辯說如河縣所知非苟知而亦允蹈焉出入口耳者  
彼我奚足言却來自秦京過我汾水邊未幾復言別長  
途北之燕行看奮六翮高舉凌雲烟功成名遂後歸老

河之壖相從講聖學與子長周旋

感遇二首

中林有幽蘭蘿生雜衆草  
地僻人不知芬芳空自好  
嚴霜凋古木歲晚難獨保  
願充君子佩探擷尚未早  
安得清風來吹香出林表

高林夾金井修竹連清池  
梧葉既蕤蕤竹實亦纍纍  
可棲復可食鳳鳥來何時  
重華不得見韶樂何能為  
日暮空歎息蕭瑟寒風吹

變白頭吟

梧桐不獨老鴛鴦亦雙死靜女懷貞心徇夫正如此奈何及末流不知再醮羞中路多反目幾人能白頭君不見會稽愚婦輕負薪不肯終身事買臣一朝歸佩太守印悔望車塵那敢近人生賦命自不齊貧賤富貴各有時隨雞逐狗聽所適世事悠悠爭得知

閒中作

雄雞啼一聲驚起五更睡出門何擾擾競逐名與利冥

冥車馬塵白日暗城市蕭條蓬蒿居獨有羲皇地高情  
杳秋雲靜性凝止水俛仰天地間澹然無一事

東坡赤壁圖

先生矯矯人中龍京塵千丈不可容五年一夢落江海  
翩然野鶴開囚籠雪堂閉戶讀書史興來飄然弄雲水  
黃泥坂下醉三更赤壁磯頭船一葦明月清風共一江  
邁往之氣無由降酒酣作賦記清賞袖有巨筆如長杠  
一朝騎鯨尋李白人間俯仰成今昔續絃無處覓鸞膠



見畫思公空歎息

風雪障面圖

頑雲暗空雪正飛  
老木殭折溪流澌  
敝裘羸馬耐寒子  
便面障風何所之  
僕夫徒行亦良苦  
吻噤不語心應語  
人生受凍分豈無  
但願不作君家奴

秋日雜詩

山中有佳人  
考槃歌在澗  
別來今幾時  
歲月忽已晏  
相思不得書  
矯首望飛鴈

寄元遺山

詩到夔州老更工，只今人仰少陵翁。  
自憐奕世通家舊，不得論文一笑同。  
草綠平原愁落日，鴈飛寒水怨秋風。  
黃金鑛裏相思淚，幾墮憑高北望中。

秋日懷李仁卿

獨倚斜陽百尺樓，故人千里思悠悠。  
陶唐祠下烟光晚，姑射峯前鴈影秋。  
樽酒幾時同李白，雲山多處是并州。  
臨風惆悵無人會，一曲商歌寫暮愁。

為麻信之壽

中州人物一元龍卓犖英才碗磊胸濁酒數盃遺世慮  
清詩千首傲侯封諸郎照眼三珠樹舊業關心五老峰  
頭白他年賦歸去綵衣扶杖看從容

送王仲通

從事西遊五見春翩翩書記日爭新懷鄉不作登樓賦  
佐府真為入幕賓世事忽驚翻手雨馬蹄又踏化衣塵  
古來燕趙多豪傑定有飛書薦鶚人

上巳日感懷

舊遊桃李浣兵塵十六年悲客裏春浮白可能澆硯礪  
踏青聊且慰酸辛蘭亭修禊人何在庾信傷心賦又新  
芳草喚愁花濺淚東風回首一沾巾

白菊

數枝的皪照秋清何物為花乃寧馨玉骨冰肌誇皎潔  
風瑤月珮想娉婷霜迎葉上迷青女露下籬邊泣素靈  
見說寒英能愈疾擬開三徑著茅亭

紅葉

枝上萎黃慘未乾  
嚴霜一夕總成丹  
色烘曉日燕脂暖  
影濯秋江蜀錦寒  
南鴈數聲催晚晚  
西風幾度見凋殘  
橫山樓下梨千樹  
每憶童年九日看

北宮

光泰門邊避暑宮  
翠華南去幾年中  
干戈浩蕩人情變  
池鳥荒蕪樹影空  
魚藻有基埋宿草  
廣寒無殿貯涼風  
登臨欲問前朝事  
紅日西沉碧水東

趙吉甫種德園

培植功夫與日新風光別是一家春  
三株槐茂堂堪構九畹蘭芳佩可紉  
桃李陰成應有地棟梁材出豈無人  
從今不羨燕山竇五桂聯芳一老椿

寄鄉中故人

十年夢繞故山薇世事悠悠與願違  
華表未成遼鶴語青冥空羨塞鴻歸  
雲橫北嶺迷鄉眼塵滿西風浣客衣  
為報吾州舊親識短書相慰莫令稀

送侯君美歸雲中

暫時相見又相違，留滯天涯更易悲。  
客淚清和秋雨落，鄉心杳逐朔雲飛。  
路經險阻行須穩，書報平安寄莫遲。  
邂逅故人如問我，為言貧病未能歸。

自趙城還府

簡子城邊過盡春，却尋歸路並清汾。  
落花亂逐溶溶水，遠樹低連漠漠雲。  
姑射雨晴山似染，玉官風暖草如熏。  
獨憐疲俗誅求困，愁歎聲多不可聞。

讀唐詩鼓吹

傑句雄篇萃若林細看一一盡精深才高不似人間語  
吟苦定勞天外心白壁連城無少玷朱絃三嘆有遺音  
不經詩老遺山手誰解披沙揀得金

弔王內翰從之

往年高步到瀛洲豈料東陵是故侯庾信竟歸周室老  
劉楨真有岱宗遊山瞻斗仰名空在桂折蘭摧恨未休  
鬱鬱佳城滹水上野烟寒草又經秋



上韓應州

天挺英雄入穀中堂堂自有古人風  
應機力贊興龍業唾手能收汗馬功  
四海威名方共仰一時才武更誰同  
潁川不是留黃霸行拜中書作相公

懷劉京叔

奕世金蘭契於今只有君英才  
殊落落餘子漫紛紛一別幾春草  
相思空暮雲何時展良覲把酒共論文

宿雲臺觀

趨程疲永路託宿喜琳宮蓮嶽三峯對松林一逕通地  
偏殘暑失境靜俗塵空入夜清詩夢山泉落枕中

中條阻雨

行李淹蒲坂歸期念晉州高風千葉下寒雨一山秋澗  
響頻驚夢蟲聲亂入愁酒醒孤館裏心折大刀頭

初秋雨後

積雨蕩煩暑迴風吹早涼老苔翻舊碧病葉墮新黃久  
客應吾道浮生半異鄉黑貂渾敝盡愁看一開箱

九日

幽閑

嬾慢令節廢招尋無復歡娛地空驚

閑

閉

門黃菊晚步履紫苔深尚友陶彭澤悠然

閑

鴈

北塞迎霜雪西風送羽翰數行天澹澹萬里路漫漫日  
落秋聲急江空暮影寒故人書斷絕矯首望雲端

幽居有感

閒居仍地僻門閉草萊深車馬無還往詩書有討尋嚴

霜催歲晚屋破覺寒侵計拙煩親舊誰能數賜金

秋風亭故基

危亭冠雉堞飛構何崔嵬一夕墮劫火變化成烟灰  
基翳蓬蒿壤道封莓苔蕭條古城上空有秋風來

除夜

三十七年過勞生強半休此心空耿耿吾道每悠悠  
感物百憂集思親雙淚流春風添一歲又是五更頭

送李郭二子還鄉

喪亂身為客淹留淚滿衣亦知生處樂未卜有年歸祖  
帳臨寒水仙舟漾夕暉春來一相送腸斷故山薇

中書耶律公挽詞

虎嘯龍興際乘時自有人風雲開慘淡天地入經綸忽  
報台星坼仍傳薤露新斯民感無極灑淚叫蒼旻

應州廟學釋奠

夜色齋厨肅秋風殿宇清右文遭聖代備禮引諸生牢  
醴嚴三獻豆籩陳兩楹祭餘同飲福旭日樹頭明

送李端卿東行

故人有所適驅馬出東城紅樹添秋色青山滿去程曾  
為同省掾偏愴遠離情別後能相憶因風為寄聲

子猷訪戴圖

興盡空回雪夜舟訪人虛語亦悠悠須知汾水多奇士  
豈獨王家一子猷

梅影

隔窗渾似李夫人江月多情為返魂宛是依依舊顏色

向人憔悴立黃昏

秋夜

寂寂江城夜向闌  
西風吹鴈叫雲端  
一聲遠過南樓去  
月滿碧天秋水寒

臨潼溫泉

琢玉為池浴太真  
芙蓉花暖水生春  
誰知寂寞千秋後  
留與行人洗路塵

長安早發

行李忽忽漚水頭雨餘涼氣動新秋五更馬上還家夢  
先逐西風到晉州

秋夜聞笛

雲淨寒空月滿樓何人橫玉叫清秋梁州才罷伊州起  
不盡關山此夜愁

廢宮

斷磚殘礎碎盤花輦路荒涼蔓草遮玉殿朱樓俱不見  
壞墻嵒嶙遶人家



過茹越嶺有感

山川良是昔人非北望松楸淚滿衣三十餘年成底事  
全家南渡一身歸

蒲津晚渡

黃河城下水沄沄船去船來幾夕曛老盡津頭垂釣客  
柳陰相對白鷗羣

陳參議賡

二十首

補

補陳賡字子颺官河東山西道行中書省參議

遊龍祠

黃河如絲導崑崙萬里南下突禹門枝流潛行大地底  
派作八道如霆奔吾聞川真嶽靈有冥宰況乃利澤開  
洪源神龍窟宅瞰平野千古廟貌何雄尊深林含蓄雷  
雨潤冷殿似帶波濤痕我來南州走塵坌執熱未濯憂  
思煩試甦甘冽洗肝肺一勺注腹清且燉悠然晞風坐  
東廡倏見繪畫如飛騫仙官華裾乘朱軒旗纛掩謁蛟  
伏轅雷公電母踏烟霧天吳海若驅鼉黿何時借取霹

霍手倒挽銀漢清乾坤廟前老翁顧我語孺子未易排  
天闢胡為高論乃如此一笑滿面春風溫是時三月遊  
人繁男女雜還簫鼓喧奪焚沉玉答靈貺割牲醢酒傳  
巫言巫言恍惚廟扉闔拜手上馬山烟昏

峴山秋晚圖

大山高嵯峨小山低崕嶺清江錦樹帶秋烟烟際人家  
在林數荆河迤南三峴山此圖定繪襄陽否詩人翰墨  
丹青手落筆天機隨所有峴首直在襄陽西遙觀漢水

舍風猗上有龜龍一片石云是羊公墜淚碑試披禹跡  
考地志畫師寧免詩人疑且看滿眼江山好休作燕人  
過晉悲

子猷訪戴圖

兩晉崇玄虛風流變華夏舉世尚清談天地指一馬嵇  
阮竹林賢鴻名重天下王郎衣冠胄亦復慕草野偶來  
剡溪上溪水正清瀉扁舟信沿洄氣韻何瀟灑誰與好  
賢心丹素入圖寫山陰懷古意欲攬不盈把賦詩心夷

猶六義婉騷雅西風塵冥冥倘有知音者

鐵拄杖

閼王鐵杖如榔栗得自荒虛鬼神域鞭笞蛋蠻今幾年  
霧翳雲蒸老蛟黑腹中有簧如細泉牙節宛轉聲鏗然  
天生神物不虛棄提攜萬里歸坡仙坡仙騎鯨凌紫烟  
海山一去今千年人間俯仰成今古紛紛長物何須數  
洛陽銅駝卧荆棘昭陵石馬埋烟雨百斛鼎兩錢錐小  
大用舍俱兒嬉商顏鶴髮一節竹何似凌烟功臣玉具

高摺頤黃閣得君真耐久扶持四海經綸手會須挂到  
崑崙顛九點青山看九有鐵邪杖邪吾不知誠將道眼  
窺天機一朝雷雨轟空陂須防化作蛟龍飛

武善夫桃源圖

武郎種桃滿雲溪三月紅雨行人迷自從玉勒入雲馭  
春風杜宇年年啼飛黃騰踏有天倪紫電轉盼天山低  
要將白壁沾蛾眉更把黃金鑄裏蹄羲和挾輶六龍馳  
暮景空迫虞淵西新詩擬喚槐安夢咫尺溪邊春色動

飛花漠漠水泠泠蒼苔荒了烟霞洞聞道西風解浣人  
何處江山可問津征塵障斷仙源路且看丹青萬樹春

送李長源

月下孤鴻枕上雞高城今日又分攜九秋雲氣峭陵底  
萬里河聲砥柱西飲罷關山秋寂寂詩成風雨暮淒淒  
千金善保并州器要放崑崙入馬蹄

寄陝郡楊正卿

西奄

臨川堂上看飛鴻十載西川一轉蓬親老家貧初有累

才疎意廣卒無功姦雄頗忌孔丈舉富貴何如張長公  
滿地塵埃浮世狹一帆思駕五湖風

遷客形容國士心春風鶴髮不勝簪鍾儀去楚衣冠異  
王粲依劉歲月深歲晚艱危無短策酒酣悲壯動長吟  
遙憐蘭省楊夫子一紙書來抵萬金

宣宗挽詞

洛邑周初定蒼梧舜不還九天來鶴馭萬國泣龍顏儉  
德高千古鴻勳際兩間無由望弓劍雲氣鬱橋山



寒食祀墳迴登臨晉西原廢寺

前朝廢寺枕山阿尚有摩雲宰堵波故國已非唐日月  
老僧猶指晉山河年來筋力登臨倦亂後心情感慨多  
石蘚荒碑碎文字他年更得幾摩挲

當年雲構接天開一夕煙塵化劫灰佛閣丹青餘瓦礫  
禪房花木亦蒿萊春風萬里騷人怨落日千秋杜宇哀  
斷礎荒烟無限意一章詩律為誰裁

送寇輔臣

古陌風塵點客衣  
送春君亦伴春歸  
東風不管離人恨  
吹落楊花滿地飛

蒲中八詠為師巖卿賦

蒲津晚渡

雲濤注壺口水府  
蟠九壘公子莫爭  
舟蛟龍方骯髒

虞坂曉行

伯樂沉九原泥塗  
困騏驎千古長坂  
空無人知此意

舜殿薰風

巖廊鳴五絃薰兮南風來鳳去巖音絕胥井生莓苔

首陽晴雪

天風吹瓊瑤自冒首陽頂欲和采薇歌千山凍雲冷

東林夜雨

林壑冷含秋風雨黯如海何如贊公房青燈淡相對

西巖疊嶽

梵剎盤空曲烟霞錦綉紋山靈倘招隱徑入萬重雲

媯汭夕陽

莫階降英皇此地嬪有虞南巡竟不返愁雲接蒼梧

王官飛湍

懸流落雲巖遙空挂飛練何時甦清冷一額黃塵面

陳提舉庚

十九首

補

補陳庚字子京賡弟任平陽提舉

送麻信之內鄉山居

四海紛拏戰虎龍驚膚無計脫園中莫貪利祿遭時忌  
要學聾牙與世同汝水應逢寒食雨浙川行趁舞雩風

離心洗蕩方如許，莫上危樓聽斷鴻。

弔麻信之二首

敝屣功名懶著鞭，劇談豪放本天然。  
閒來每愛從人語，醉裏何妨對客眠。  
體瘁漸成中酒病，家貧全仰賣碑錢。  
堂堂一去今何在，三尺孤墳罩野烟。

風采瓊林未足侔，一朝零落委山丘。  
君恩未賜金蓮炬，天闕俄成白玉樓。  
詩類貫珠尤可翫，室如縣罄更堪憂。  
路遙未暇憑棺奠，悵望中條涕泗流。

答楊煥然二首

梁苑當年記盛遊，亂離南北恨遲留。  
且教紅袖歌金縷，莫對青山歎白頭。  
人似贊皇遷蜀郡，詩如子美到夔州。  
傳家況有玄文在，應使童烏繼纂修。

獻賦當年覲紫宸，羨君藻思獨超羣。  
扶持吾道難尤力，潤色斯文老更勤。  
學際天人寧有伴，文如風水自成紋。  
何時載酒清伊上，寄字時來問子雲。

清明後書懷

花氣薰人動竹齋，貪春狂思若為裁。  
蜂粘落絮飛還墜，燕認新巢去復來。  
亂後精魂猶夢境，貧中風景剩詩才。  
江山信美非吾土，懷抱何時得好開。

送孟駕之赴闕

文史相從二十年，歲寒心事久彌堅。  
向來才力驚游刃，此去功名穩著鞭。  
淺綠美依沙漠草，橫青遙指拂廬烟。  
應將萬字匡時策，挽取恩波下九天。

病後贈姚仲寬居士

寂寂柴關晝不開  
虛簷獨步意徘徊  
百年素業南柯夢  
一寸丹心古鼎灰  
野老相過聊問訊  
溪禽近啄不驚猜  
好奇誰是劉公子  
肯為揚雄載酒來

有懷家兄子颺

蕭蕭雙鬢半成絲  
疊疊襟懷抱所思  
趨向自知違俗好  
文章只合伴兒嬉  
嵩西晚照霞明處  
洛汭秋風鴈過時  
中有先人敝廬在  
與君何日理茅茨

贈李彥誠



五嶽分崩四海傾便宜一別盡今生艱難契濶重相見  
四十餘年老弟兄

峴山秋晚圖

當年叔子愛茲山陵谷回頭幾變遷縱使豐碑今尚在  
遊人誰復一潸然

題師巖卿蒲中八詠

蒲津晚渡

中條山色照黃河競渡行人晚更多城上危樓倚霄漢

凭欄有客正悲歌

虞坂曉行

五更風露正清冥  
馬首殘蟾分外明  
好句墮前俄失去  
微吟倏過古虞城

舜殿薰風

德化當年被海隅  
熙熙物性盡昭蘇  
不知今日吾民愠  
一聽琴聲解得無

首陽晴雪

山頭晴雪照城樓  
潑水融銀眩兩眸  
蕩滌寒威須美醞  
浮香醅醖夜來芻

東林夜雨

瀟瀟寒雨濕觚稜  
古殿長廊夜氣增  
此地此時誰得意  
龕燈一點坐禪僧

西巖疊嶽

螺髮烟鬟矗萬峰  
行人指點梵王宮  
鳥飛杳靄蒼茫外  
人在霏微空翠中

媯汭夕陽

水曲山河古樂鄉  
聖謨曾此降英皇  
遺風欲問應無處  
破屋頽垣半夕陽

王官飛湍

表聖當年愛此山  
倚樓終日看飛湍  
後人空飲貽溪水  
不學先生便挂冠

白雲子房皦皦

三十一首

補

補房皦皦字希白自號白雲子

# 江上行

浮雲澹澹心悠悠杖藜來作江邊游  
商人打鼓催行舟  
洪波不斷東南流木葉蕭蕭荆楚秋  
勸君休上王粲樓  
日落滄江增暮愁

## 賣劍行贈韋漢臣

滄海波未澄無人斬長鯨  
韋郎三尺玉匣中鳴不平蛟  
龍一出雷雨隨翕忽變化清  
四夷可惜有才不見用青  
天白日將何為酒酣起舞抱劍哭  
肅肅悲風動茅屋不

如南山學種田自古青萍換黃犢

扣角歌贈史吉甫

剝剝剝扣牛角自從破却黃雞殼陰陽二氣分清濁  
則為風震則雷流者成川峙者嶽易道常行日用間  
醉夢昏昏人不覺伏羲不得已而畫文王不得已而重叔  
世不及上世隆夫子不言人益蒙著成大傳開盲聾譬  
如日出滄海東無物不在光明中峨嵋山人史居士來  
到公安大智寺手攜牛角欲何為發明三聖心中事人

言康節是前身但不家居洛之溪胸中一部皇極書造化功夫際天地舒之則彌滿六合卷之則不盈一握近之則在乎目前遠之則入乎冥邈有人來問先天學扣牛角剝剝剝

貧家女

貧家女德性溫柔寡言語終身辛苦不下機身上却無絲一縷倡家女兒百不會只向人前賣嬌態繡裙端坐青樓中銀燭熒煌照珠翠書言福善與禍淫未必天公

有此心盜跖長年顏子夭古來顛倒非獨今高處是崑崙低處是東溟崑崙推不倒東海填不平物之不齊物之情貧女莫羨倡女榮不義富貴浮雲輕持身但如冰雪清德耀荆釵有令名

送王升卿

傷哉船子峰頭月昨夜團團今夜缺月華猶自不長圓人生安得無離別世上憂端千萬許惟有別離心最苦  
盧川春晚送君行落花為我啼紅雨四海紛紛尚戎馬



我曹只合歸林下如椽大筆今無用日課新詩自陶寫  
嵩陽佳處如罨畫溪可漁兮田可稼我欲從君覓隱居  
却恐山靈嫌俗駕

題呂仙亭

岳陽城南呂公洞道人見客無迎送事少方知日月長  
身閒未覺功名重竹影松陰生午涼山色湖光設朝供  
高吟下視世間人幾人不在黃梁夢

寄呈岳陽諸友

稟性太褊率不受塵事觸自小遠市廛僻居在巖谷人  
間嗜好心舍書百不欲一飽更希求簞瓢隨分足失脚  
墮世路纏糾若微纒人以官為榮我以官為辱平生喜  
高潔為官近卑俗平生喜曠達為官窘邊幅平生喜疎  
散為官貴圓熟平生喜忠鯁為官多諂曲澆漓當此時  
古道那可復鷦鷯巢一木偃鼠飲滿腹誰能朱門中區  
區勾梁肉折腰趨下風不厭解印速青山喚我歸早晚  
謝羈東一樽石上酒浩歌對松菊

題張信之見山堂

自古朝市人罕與山相會山豈欲遠人人自與山背張  
侯創新居正在闌闌內何以得青山坐上日相對胸中  
有丘壑眼前無障礙人物既蕭散山不問內外晚來天  
氣佳收目入清快乾坤無一塵草木有多態千里好風  
來幾縷殘霞在拄笏當此時未覺功名大

慶王鼎玉生子

魏侯照乘珠卞氏連城玉此物豈易得君家貯滿屋平

生積德深天錫以多福熊羆入夢頻不待封人祝長者  
已雄偉幼者更清淑指日看騫騰誰為犀角禿願君剩  
買書學語便教讀斯文久不振六經要再續人生宇宙  
間百歲一瞬速美惡暫時休何者為榮辱且為引寧馨  
遶院種松菊陶潛歸去來有子萬事足

戊子

萬事人間已飽諳一身猶自客天南行非楊秉三無惑  
性似嵇康七不堪俗學為名多外飾聖人養德貴中含

有時靜坐深思省三十年前總是慙

寄段誠之

咫尺春風三十三不如歸卧舊烟嵐  
浮雲富貴吾何慕  
陋巷簞瓢分所甘  
多語數窮深可戒  
虛名無用不宜貪  
寥寥孔學今千載  
賴有斯人可共談

次前韻寄王升卿

谷口人家十二三家  
家窓戶得晴嵐千章雲木秀而野  
一脉泉流清且甘  
徇俗到頭終是病  
耽書自古不名貪

作詩為問東溪友樽酒何時慚笑談

辛卯生朝呈郭周卿段復之

甕面醯雞積有年近來霧豁見全天  
出言最忌談人惡入德尤宜去自賢  
回也屢空趨聖域參乎一唯得心傳  
佛岐老徑雖高絕不及中庸道坦然

贈趙山甫

寇盜連年劇蝟毛一身無處可奔逃  
陳平自合西歸漢諸葛焉能北事曹  
嗟我命兼才共薄仰君名與德俱高

幾時一笑滄浪畔右手持盃左手螯

哭楊叔能

仰看飛鴻俯看鱗計來不覺淚沾巾風塵末路尤多難  
山澤癯儒只合貧亂後有誰收恨骨眼前無復見斯人  
襄陽舊隱依然在花落空庭冷淡春

和李正甫九日韻

論著哀時總可哀不如且放笑顏開留連風月憑詩句  
管領江山有酒盃我欲處身如此處君言裁恨若為裁

從今但有錢三百相約高樓盡醉迴

憶新塙劉德淵

雲烟杳靄水微茫何處青山是岳陽白髮滿頭空自老  
黃塵兩腳為誰忙同盟鄂渚言猶在偕隱廬峰興未忘  
近有倦遊詩數首西風吹不到新塙

思隱

得箇黃牛學種田蓋間茅屋傍林泉情知老去無多日  
且向閒中過幾年詘道詘身俱是辱愛詩愛酒總名仙



世間百物還須買不信青山也要錢

寄王文炳

愛客孔文舉能詩陸士衡十年求識面千里飽聞名  
郁芝蘭秀蕭蕭風露清幾時樽酒畔容我話平生

和楊叔能之字韻

遭亂重相見寬心不用悲江山佳麗地人物太平時  
白蟻千家酒黃花九日詩鹿門不可隱吾道欲安之

丙申元日

三十八年過星星白髮多干戈猶浩蕩蹤跡轉蹉跎世  
事堪長歎吾生付短歌江湖從此逝烟雨一漁蓑

辛巳巴東元日

舊日逢春喜而今怕見春紅塵長路客殘病老夫身政  
拙難書考家貧只累人自憐頭上髮更比去年新

秋夜

百計求安未得安此心雖在鬢凋殘漫漫長夜渾無睡  
蟋蟀堂深秋雨寒

自遣

幾見秋風幾見春  
一愁未已一愁新  
閒中點檢平生事  
唯有清貧不負人

甕面浮香處處春  
任他時事百端新  
自知野鹿山麋相  
不是麒麟閣上人

別西湖

聞說西湖可樂飢  
十年勞我夢中思  
湖邊欲買三間屋  
問遍人家不要詩

題張濟之勝覽軒

誰言山色可忘憂  
誰道澄江消客愁  
試倚闌干西北望  
浮雲依舊暗神州

讀杜詩

後學為詩務闢奇  
詩家奇病最難醫  
欲知子美高人處  
只把尋常話做詩

磅礴冥搜枉費功  
天然一語自然工  
況兼詩是窮人物  
好句多生感慨中

千里奔馳蜀道難  
草堂賓主罄交歡  
怒冠三挂簾  
鈎上誰謂將軍禮數寬

春日觀菜

手種蕪菁欲療飢  
春來頗怪發生遲  
東風貪長新桃李  
未有功夫到菜畦

御訂全金詩增補中州集卷五十五

欽定四庫全書

御訂全金詩增補中州集卷五十六

遜菴段克已上

共一百七首以下已借刻顧嗣立元  
百家詩二選中補

補克已字復之河東人世居絳之稷山幼時與  
弟成已並以才名禮部尚書趙秉文識之目之  
曰二妙大書雙飛二字名其里金末以進士貢  
北渡後與成已辟地龍門山中餘廿年而卒人  
稱為遜菴先生泰定間吏部侍郎輔合克已成

已遺文為二妙集刻之家塾臨川吳澄為之序  
曰河東二段先生心廣而識超氣盛而才雄其  
詩如冤血流未盡白骨如山丘四海疲攻戰何  
當洗甲兵蓋陶之達杜之憂兼而有之者也

歲己酉春正月十有一日吾友張君漢臣下世家  
貧不能葬鄉鄰辦喪事諸君皆有弔章且邀余同  
賦每一付思輒神情錯亂秉筆復罷今忽四句矣  
欲絕不言無以寫其哀因作古意四篇雖比興之



不足觀者足知余志之所在則進知吾漢臣也無  
疑

高樓浮雲端知是何人宅賣珠輕薄兒身為五侯客日  
暮闌雞回車騎何翕赫鼻息吹虹霓行路皆踖躅豈知  
黔婁生儲粟無儋石衣衾不掩尸送我城東陌寥寥百  
世下誰分夷與跖

北方有黃鵠飽義氣勇烈天寒辭故巢思欲近丹穴吁  
嗟翅翎短雲海路隔絕鳳凰不相待孤憤無由洩恥與

鵲羣朝夕肆饕餮一步兩叫號心摧口流血側頭向  
蒼昊永與羈雌決人皆尚鵲爲反謂黃鵠劣世無棄瓢  
翁軒輊定誰說猿鶴與沙蟲泯泯同一轍悲來結中腸  
欲辯再三咽

藝蘭當清秋生育胡不早西風發微香能得幾時好飛  
霜半夜來滅沒先百草真宰獨何心吞聲不復道

驅車上太行中道車軸折停車伏轅下骨斷筋力竭撫  
膺呼蒼天淫淫涕如雪古往與今來此恨何時絕

贈答封仲堅

念昔始讀書志本期王佐時哉不我與觸事多憾軻歸  
來濯塵纓羸裝聊解馱午片多奇峰流水出其左誓求  
十畝田於此養慵情種椒盈百區栽竹僅萬个自謂得  
所依心口默相賀經營久未成韞積乏奇貨低回不能  
去借宅便高卧始構茅三間棖桷久摧挫暑雨畏霖潦  
霜風苦掀簸豈無富貴人粟帛救寒餓耻隨肥馬塵擁  
鼻不敢唾淹延歲月深十手指庸懦塵靈劍鋒缺彈缺

悲無奈時當春之仲桂魄月半破丁丁聞啄門有客來  
相過探懷出新作高唱成寡和清辭麗卿雲齊梁那復  
課蹇余鞭不前躑躅蟻旋磨枯腸藜覓苦奇字厭搜邏  
君乎真可人沽酒洗塵浣酒酣膽氣麤狂言驚四座舊  
遊渺何許行路方坎坷作詩寄同聲別離傷老大

興上人駐錫姑射山之麓他日邀余所居之淨樂  
齋勉為賦此

我愛興上人閒處先著脚雖有買山錢難尋一丘壑向

來棲息地龍象久寂寞重尋林下徑竹石苦紛薄溪水  
恣交流巖花自開落却掃丈室中一餅還一盞淨樂題  
其顏塵緣聊解縛寥寥千載下此理誰發樂我今為拈  
出未一作不免一重錯有淨必有垢無苦亦無樂混沌元  
不死七竅剛自鑿鄭一作珍重菴中人萬法本無著獨有  
太古心油然滿寥廓

贈劉潤之

平生不願萬戶侯但願一識劉荊州荊州已遠不可見

喬孫今幸從吾遊慨然議論吐肝膽腰間古劍鳴蛟蚪  
酒酣醉墨出險怪筆勢懍懍令人愁世人爭欲得一諾  
黃金不用如山丘結交以義不以利樂人之樂憂其憂  
自從管鮑死此道今悠悠豈意流俗中忽見古人儔古  
來賢哲仕不達飢寒不解為身謀紛紛眼底知音少幾  
向西風嘆白頭

乙巳清明遊青陽峽

東山氣象太猛悍萬馬駸駸來楚甸中分不肯割鴻溝

鍛礪戈矛期一戰西山折北如西漢獨餘絳灌奔而殿  
誰為劉項決雌雄賴有韓彭力相援盧溝直下兩水合  
泯泯暗流通一線突為瀑布出山口流沫成輪浪成漩  
前逾百步落石甕黛蓄膏渟那敢眇沈沈南去若白虹  
為嶼為沚互隱現鑿開混沌幾千秋世俗雖見如不見  
今人誰有筆如椽為寫佳名傳寓縣人間佳節重清明  
呼兒折簡招諸彥一生能著幾兩屐佳處每欲經行遍  
山靈著意勸遊人吞吐烟霞生萬變山阿玉女跪焚香

巖畔仙人一笑倩居

一作坐

者儼若帝王尊劍佩雍容侍

閒宴植者磊落如鉅人聚立廣庭議

一作如

封禪拱者矯

矯如勇夫執戈夾

一作記花

著綦弁平灘淺瀨乍可揭溪

路曲隨峰勢轉葛屨偏宜苔蘚滑行襟時被薔薇罨當

面烟嵐舞翠蛟出岫閒雲飄素練羣行不復事拘檢眼

正明時脚還倦班荆共坐溪上石鉅觔濁醪具時饌良

辰無奈夕陽催羽觴正要清歌薦醒心況復有寒泉玉

池遍返成三嘯三分春色二分休風外飛花時一片古



人行樂欲及時半百之年猶掣電惟有愛山緣未斷夢  
寐孱顏添健美一窮到骨不自治虛負胸中書萬卷漫  
向山中老却人生來不識荊州面肝膽槎枒須酒澆顧  
我非狂亦非狷紛紛世無真是非一作世上無真是棄置從渠  
若秋扇歸來新月偃林梢寂寞衡門掩深院

戊申四月遊禹門有感

黃河一線天上來兩山突兀屏風開天生聖人為萬世  
驚濤拍岸鳴春雷冷雲直上三千尺石巔古廟高崔嵬

斷碑歲月不可考丹青剝落空莓苔嗟乎去古蓋已遠  
荒辭漫汗相驚猜安居平土果誰力愚民耳目誠可哀  
一聲漁笛起何處滄洲雅興還悠哉

正月十六日夜雪

正月望夜夜氣交長空月輝生白毫東風澹蕩振林木  
春雲滃鬱翻驚濤望中已覺沒河漢坐中不見羣山高  
打窓雪片大如手蒼髯喋痺磔蝟毛我意天心厭誅戮  
淨洗戰血除腥臊方今廊廟已備具左有夔龍右有咎

愛民親賢急先務朱輪皂蓋馳英豪遺黎幸脫瘡痍阮  
謳吟聖世心堅牢驅牛負耒復門戶至今不復遠遁逃  
白頭老儒最無用天才魯鈍非時髦日月消磨兩蓬鬢  
天地飄零一緼袍詩書自足教穉子藜藿猶能飫老饕  
清晨喜看蔬圃潤而可暫息抱甕勞蘭芽含甲未出土  
蕭艾覆隴已可薅閒中事業澹無味佳趣纔如食蟹螯  
興來歌詠適性情背癢似得麻姑搔芹山苗翠寒玉瘦  
芹水澄澈春蒲桃直緣山水久留戀日向溪頭醉濁醪

青雲富貴豈不願  
蟠木輪囷寧自韜  
結構大廈要梁棟  
操割清廟須鸞刀  
功名倘可跂契稷  
跳梁里巷誇兒曹  
君不見昔在周王  
師呂望快若逢尹  
彎烏號大人虎變  
固莫測運命由來  
有所遭蓬萊方丈  
在何處我將入海  
恣遊遨天風飄飄  
鯨背穩下視塵世  
空嘈嘈

微雨後偶成二首

孤憤憑誰訴  
長歌聊自怡  
整衣憐瘦減  
扶杖覺衰遲  
小飲非愁敵  
輕寒與睡宜  
今朝春雨好  
穉子莫啼飢

寂寂春歸後悠悠夢覺時病添花懊惱愁耐酒禁持  
貯無多粟囊封有許詩倚牀成獨笑此意幾人知

余僑居龍門山十有餘年封張二子日從余游而  
貧又甚焉因寫所懷兼簡二子共成一笑

病久慵增劇塗窮事轉迂木兼形共槁雖與地俱無醉  
語勞揮塵悲歌漫叩壺鮮鮮籬下菊笑汝益羈孤

仲堅見和復用韻以答二首

道在山林勝心閒歲月迂家風貧更好習氣老難無日

力分詩卷生資負酒壺儒冠三十載轉覺此身孤  
一飽不易得身謀方信迂家徒四壁立囊至一錢無但  
喜心如水那憂腹似壺我窮君更甚此德未全孤

枕上再賡前韻

幾年成嬾散一榻了慵迂詩酒心猶在功名夢亦無雨  
來催覓句鳥去勸提壺靜裏那須此應憐客意孤

野步仍用韻示封張二子

散策溪頭路溪回路更迂山隨行處好人似往年無波

靜魚千里天晴春一壺龍門何限景歲晚不相孤

五月二十三日夜分雨作涼風颯然木葉蕭瑟絕  
似往年七八月感時物之變不能為懷漫浪成詩

聊以自適

雲壓虛檐黯不收雨聲飛妥碧山頭簾幃清徹三更夢  
枕簟涼生五月秋入夜悲風何淅瀝先時病葉已飈颼  
心非木石能無感喚起悠悠去國愁

寄仲堅漢臣二子

經春日日卧空廬門巷蕭條長者車一卷時看王湛易  
數行嬾寄子公書風光少得如人意顏面從教與世疎  
閒健不來花下醉明年花發定何如

和家弟誠之社燕之作二首

膠膠世事久經諳肯著紅塵換翠嵐騏驎捕籬非所任  
干將補履豈能堪老無成事惟多嬾少不如人何更貪  
花下一杯誰伴我清風明月便為三

欲歸誰不遣君歸却恨歸來事事違烽火未休家信少



山川良是故人稀黃金入手還能散白雪

一作髮

盈頭不

肯飛試問春愁多幾許長江滾滾日暉暉

紅梅用誠之弟韻二首

梅花香發蒲蒲團萬事人間總不干醉夢每憐春意淺  
詩魂長遶夜枝寒記曾上苑枝頭見又向前却雪裏看  
回首青鞋已如豆齒牙衰朽怯微酸

小梅初破月團團戲蝶游蜂未敢干醉臉不禁經宿雨  
芳心似欲訴朝寒乍驚別後容華換更與樽前仔細看

便好栽培近東閣免教風味一生酸

排悶

四海干戈戰血腥頭皮留在更須名病尋藥物為閒計  
悶引文書作睡程萬事轉頭慵挂眼一杯到手最關情  
此身定向山間老我與山英有舊盟

暮春有感三首

忙攜歌酒趁清歡桃李都能幾日看欲識詩人愁絕處  
落花時節一凭闌

春到蕪菁事已非杜鵑看又喚春歸幽香一點無尋處  
燕蹴飛紅染客衣

及時行樂不應遲管領風光更有誰花落花開春又去  
都能消得幾篇詩

梅花十詠

錄四

憶

姑射仙人冰作膚昔年伴我向西湖別來幾度春風換  
標格而今似舊無

折

白玉堂深夜色寒玉兒和月倚蓬山高情不似章臺柳  
也許餘人取次攀

興

手撚冰髭步月華暗香先已透垂瓜壽陽畢竟無才思  
但卧含章拂落花

浸

玉骨渾將山麝熏冰肌得水更精神凌波微步東風軟

羞殺當年洛浦人

花木十詠

錄四

荷葉露

仗下華清賜浴時  
溫泉香膩洗凝脂  
團花翠壁琉璃滑  
狼籍珠璣醉不知

菊花霜

風簾斜揭玉鉤欄  
端正樓高燭影殘  
宿酒困人梳洗懶  
從教殘粉浣金鈿

芭蕉雨

梨園弟子去無蹤  
門掩蓬萊繡帳空  
寂寞綠窓深夜雨  
傷心不獨有梧桐

山茶雪

娘子宮中儀體新  
八姨羞把舊妝勻  
畫羅瑞錦難相稱  
故著龍香簇絳巾

丁未三月二十八日縣大夫薛君寶臣過余芹溪  
精舍酒間雨作時方苦旱喜而賦之

麥田日日起黃埃官長憂民意不開底事山靈相嫵媚  
故驅風雨過江來

明日李生湛然見和仍韻答之

東風吹雨絕纖埃樽酒相逢盡日開不是官閒公事少  
此中能得幾回來

景純浩然見過徑飲成醉夜中雨作比近五鼓月  
色滿室曉起書長語贈二子

退之方北歸見蝎即成喜東坡還泗上鐸聲欣入耳而

沉羈旅中邂逅遇知己東風澹蕩百草芳游絲飛絮白  
日長一杯相屬對流水白酒微帶芹溪香漁歌樵唱競  
相屬不覺半山無夕陽醉卧山堂聽山雨冰雪對床揮  
夜語一燈照壁影悠悠恰似孤舟泛清楚夢回酒醒明  
月高風雨向來無處所人生哀樂本皆空莫令身世如  
飛蓬

癸卯中秋之夕與諸君會飲山中感時懷舊情見  
乎辭



少年著意賞中秋手卷珠簾上玉鉤明月欲上海波濶  
瑞光萬丈東南浮樓高一望八千里翠色一點認瀛洲  
桂華徘徊初泛灩冷溢杯盤河漢流一時賓客盡豪逸  
擁鼻不作商聲謳無何陵谷忽遷變殺氣黯慘纏九州  
生民冤血流未盡白骨堆積如山丘比來幾見中秋月  
悲風鬼哭聲啾啾遺黎縱復脫刀几憂思離散誰與鳩  
回思少年事刺促生百憂良辰不可再樽酒空相對明  
月恨更多故使浮雲礙照見古人多少愁嬾與今人照

興廢今人古人俱可憐百年忽忽如流川三軍鞍馬閒  
未得鏡中不覺摧朱顏我欲排雲叫閭闔再拜玉皇香  
案前不求羽化為飛仙不願雙持將相權願天早賜太  
平福年年人月長團圓

楸花

楸樹馨香見未曾塙西碧蓋聳孤稜會須雨洗塵埃盡

看吐高花一萬層

此詩見房祺河  
汾諸老詩集

贈醫師范子

和并引以下從  
二妙集補入

范君子和居姑射山麓世隱於醫敏給多藝能畧涉  
獵文史一日會薦紳輩於其家酒半舉大白而言曰  
不肖竊有志於斯文敢求數十字以為珍藏意甚勤  
因為賦古風一篇告之以君子之道使知所操持焉  
非直使誇衒於世實篋笥而已

我廬姑射東君居西山隅相去不十里曳杖以問途知  
我遠方來盡室相煦濡衰年況多病藥物必爾須診視  
得家法就醫時滿廬貧賤人所惡勢利人所趨君子與

於衆而獨與我娛延我升中堂列坐皆名儒酒醕既登  
俎左右羅童奴令行將無筭促使開大壺酒酣意氣逸  
高論到唐虞日晏未得歸欲起時見拘自言小邑中何  
常識士夫久客惜人情褊量動輒踰仍呼兒出拜頭角  
異凡雛從小好文字未覩明月珠長者幸有賜終身不  
敢渝既蒙主人知所願獻良圖世人豈無才惟得不能  
俱不見盆成括以是喪厥軀又徵荀氏語至察則無徒  
大辨外若訥聰明守以愚顏子稱大賢尚云有若無吾

言倘無忽榮名不須沽

同封仲堅采鷺鷥藤因而成詠錄寄家弟誠之兼

簡李衛二生

有藤名鷺鷥天生匪人有金花間銀蘂翠蔓自成簇  
褰裳涉春溪采采漸盈掬藥物時所需非為事口腹  
牛溲與馬勃良醫猶並蓄況此香色奇兩通鼻與目  
尤善療瘡瘍先賢講之熟世俗不知愛棄置在空谷  
作詩與題評使異凡草木

壽寇興祖

飄飄關輔客逸氣薄雲霄承學有源委持論生風飈束  
髮侍玉階香名滿天朝射策一不中雄文深自韜佳選  
思居洛歌詩祇和陶生涯足文史蹤跡混漁樵蹭蹬三  
十年壯志殊未凋人稱寇公後遇鼎復能調才大時不  
容坐使雙鬢焦竭來汾水上五見秋蟲號西風下木葉  
天氣正沈寥勸君一杯酒能令百憂消開懷且痛飲勿

念鄉關遙

寄張弟器之

愛酒陶彭澤映世清節耀乞食賦新詩不復事邊徼士  
生多輒軻異代或同調東山不可作敢望蟠溪釣壺觴  
聊自傾登高一舒嘯但恐汙世塵永為達人笑

山堂久岑寂晏坐度昏曉倚壁一蒲團幽人活計了日  
高鼎茶鳴風細爐烟裊曳杖涉庭除看雲頭屢矯安得  
謫仙人神遊八極表

陳君百祿隱居河汾世以醫名家臨財廉取與義

性喜諧雖外若寬縱內實重慎而有常心真善學者也辛丑之秋余疔作君調護周至既獲勿藥欲酬而不可姑以詩答其勤

我來汾沮如汾濱君所居豈期牢落際有子可與娛遺我以方藥投我以素書往來八九年問難更起予妙處心自得論說乃其餘衆議遞持執辭語費百車君以一言蔽如亂髮得梳丹砂與赤箭應用並貯儲困窮尤所重視之骨肉如孰謂斯世中乃見古人且我不為世用



以道而卷舒子胡自隱晦而不干名譽聞君有令子萬  
里今權輿于公多陰德預使高門閭請君事斯語勿謂  
吾計疎

丁酉春雪

幾日東風吹凍雲麥苗乾死埋沙塵客牀欹枕睡不穩  
寒氣偏尋老病身沉沉夜色涵牕白却訝微雲弄山月  
開門澹蕩雪滿空拂面猶疑柳花濕二氣交感天地通  
千林玉立天無風蓬萊宮闕墮人世三日不見車馬蹤

霹靂變變殊未已此瑞應知同萬里遠客休歌蜀道難  
農夫剩有豐年喜買牛便好事春耕況復新來官長清  
田家衣食無美惡不困追胥死亦樂

送李山人之燕

并序

李生湛然年四十未嘗從事於人偃蹇不與時人偶  
每遇杯酒間輒擊節悲歌感慨泣下不知者以生為  
狂生愈益放曠不羈又好為奇詭大言以驚動流俗  
人亦不之許也戊申春踵門告余曰男兒生不成名

死無以掩諸幽愚不佞誠不能與草木俱腐竊有志  
於四方先生許我乎今乃為書告常所往來者會飲  
於芹溪之上壺酒既傾客有執卮而前者曰方今戎  
馬盈郊熊羆號虎之士撫鳴劍而抵掌投壺雅歌未  
聞其人子以儒自名執古之道求合於今之事憂憂  
乎難哉顧子之囊無十金之資出無代步之乘無名  
公鉅卿為主乎其內無相生相死之友奔走於其外  
上不能激濁揚清以釣聲名下不能乘機抵巇邀一

時之利奚恃而往其果有合哉余應之曰不然夫適用之謂才堪事之謂力君子之論人當觀其才力何如耳不當以勢利言也儒者事業非常人所能知要不過適用堪事而已議者至謂不能取舍於當世豈不厚誣哉抑不知褒衣博帶者為儒乎規行矩步者為儒乎彈冠遠遊者為儒乎以是而名其儒豈真儒者耶昔者百里奚自鬻於秦管仲束縛於魯甯戚扣角而悲歌馮驩彈鋏而長歎叔孫通舍枹鼓具綿纒

之儀陸賈脫兜鍪進詩書之說使數子者高卧於林  
丘累徵而不起尚何名譽之可期屈辱之可免哉今  
之諸侯賓位尚有缺然不滿之處肯使至寶橫棄路  
側狼籍而不收苟有好義強仁皆將善其價而沽之  
況幽燕之地士尚意氣重然諾習與性成者耶生之  
此行余知其必有合也於是乎咸賦詩以為贈余於  
交游中最長特為序以冠其首

與君把臂臨黃河缺壺聲裏度悲歌玉缸酒半離筵起

千里東風射馬耳孰能忍飢學夷齊看人鼻孔吹虹霓  
莫道書生成事少男兒蓋棺事乃了劍心雖壯未能伸  
客裏蕭條逢暮春盧溝河上千株柳滿地揚花愁殺人

方平道中

沙軟新經雨風輕不起塵溪山隨處好花柳着行新放  
浪聊終日蹉跎又一春行年已如此猶復向來人  
病怯春衫薄衰憐葛履輕平蕪迷舊跡幽鳥變新聲興  
與雲俱遠心同水共清膠膠還擾擾回首笑浮生

仲堅見和復用韻以答

避世嘗辭劇為儒不厭迂能貧從古少好學似君無行  
李書填案生涯樂滿壺緹縈真孝子猶足慰乳孤

野步仍用韻示封張二子

信步不知晚歸途那計迂一歡閒裏足萬籟靜中無藉  
草更成席酌泉聊代壺娟娟林外影江月伴人孤

李山人湛然始生之朝座客各賦詩為壽亦作四  
韻以期所未至不特稱道而已庶幾盡朋友相成

之義云

脫跡豺狼外容身木鴈間  
虛舟元不繫倦翼自知還  
飲水猶能樂編茅足可跣  
莫教方寸地空負一生閒

封仲堅挽詞

但怪經過少那知生死分  
總幃徒見像樽酒罷論文  
編柎人為具丘墳誌共聞  
世無韓吏部為爾惜盧殷

張器之雄飛亭

落魄張公子身貧志不凋  
鸞棲辭枳棘鵬翼上扶搖  
季



子終懷印相如竟過橋名香膾人口詩句大牛腰

壽家弟誠之

道行不得且棲遲一唯誰傳魯仲尼瑞世不求麟鳳質  
急難空負鵲鵲詩玉堂金馬知何處白石清泉有素期  
但使平生忠義在樂天知命復奚疑

乙未人日飲范君子和酒酣賦詩呈座上諸君

正月七日春欲動拂面東風力尚微且貪席上賓朋樂  
未覺平生事業非青山綠水俱可隱白髮蒼顏胡不歸

會須高揖浮丘袂千仞岡頭一振衣

誄雙峰興上人

試尋石上再生身  
嘯月吟風性益真  
解脫蓮花祛夢幻  
忽驚野馬逐埃塵  
雙峰莫遂幽棲志  
一鉢誰為嫡嗣人  
便恐叢林無正脈  
為君一哭涕橫陳

和家弟誠之

人皆笑我我忘機  
我愛青山真得歸  
肯學班超謀肉食  
更憐京兆泣牛衣  
心非理義烏能悅  
道勝紛華是故肥

獨坐鈎簾心語口回頭四十五年非

癸卯春二月有五日衛生襲之誕日也坐中生捧  
卮酒乞言因用景純壽日詩韻以答盛意兼謝不  
敏

壓倒詩人白與元淋漓醉墨出佳篇心澄寒玉泉中水  
衣惹霜巖頂上烟歲晚相依青士瘦途窮漸覺麴生賢  
黃冠野服從人笑自斷此生休問天

自訟

無將大車塵冥冥無邇宵人惡易形吏部有書慚薦李  
萊公當軸謬推丁慎交已昧書中戒悔過聊書座右銘  
自是昌陽堪引壽不須辛苦進稀苓

彥衡喪子鄉社諸君皆有詩以慰其哀余忝交游  
之長烏能無言因賦此以贈之

昔年曾讀樂天詩晚歲情鍾玉雪兒今日為君重感歎  
片時何意便乖離迎門猶記牽衣笑撫榻空懷漲乳悲  
夢裏不知生死隔舊嬉遊處細尋推

丁巳春與詩社諸公園亭宴集彥衡有詩衆皆屬  
和一時樽俎賓席之勝殆可樂也余雖老顧不可  
虛盛意勉為賦此

秋去冬來春又催  
昆明信有劫餘灰  
心遊碧落絲千尺  
夢繞瓊林日幾回  
處世祇宜同鹿豕  
和羹誰復憶鹽梅  
老來筆力猶強健  
一首新詩酒一杯



御訂全金詩增補中州集卷五十六